

元史新編

元史卷八十五

志七之五

百官五

東宮中宮
王府官屬

詹事院世祖至元十九年立備左右輔翼皇太子之任置左右詹事各一員副詹事詹事丞院判各二員吏屬六十有二人別置宮臣賓客二員左右諭德左右贊善各一員校書郎二員中庶子中允各一員三十一年太子真金旣薨乃以院之錢糧選法工役悉歸太后位下改爲徽政院以掌之大德延祐泰定天祿間復立詹事院皆尋罷天祿間改爲儲政院至正六年立宮傅府九年冬立端本堂爲皇太子學宮置諭德一員正二品贊善二員正三品文學二員正五品正字二員正七品司經二員正七品十三年冊立皇太子定置太子賓客二員正二品左右諭德左右

贊善各一員竝從二品文學二員從五品中庶子中允各一員從六品至正十三年罷宮傅府置詹事三員從一品同知詹事二員正二品副詹事二員從二品詹事丞二員正三品首領官四員中議二員從五品長史二員從六品管勾照磨各一員正八品蒙古必閣赤六人回回掾史二人掾史十人知印二人怯里馬赤二人宣使十人其屬見後

家令司秩三品家令令丞各二員典簿二員照磨一員掌東宮飲膳供帳倉庫

典握署掌太子供帳令丞各二員書史書吏各二人府正司秩從三品掌鞍轡弓矢等物府正府丞各二員典簿照磨各一員

資武庫掌軍器翼用庫掌鞍轡各置提點一員大使一員

延慶司秩正三品掌東宮修建佛事使二員同知一員副使典簿各二員照磨一員

典用監卿四員大監少監及丞各二員經歷知事照磨各一員掌供須文成藏珍三庫內府供給段匹寶貨等物

典醫監秩正三品領東宮太醫修合供進藥餌達魯花赤二員卿三員太監少監及丞各二員經歷知事各一員吏屬凡十八人其屬司一局二

廣濟提舉司達魯花赤一員提舉同提舉副提舉各一員掌修合藥餌以施貧民

元史卷八十五
典藥局達魯花赤一員大使副使直長各一員掌修製東宮藥餌又有行典藥局官亦如之

典牧監秩正三品卿二員大監少監及丞各二員經歷知事各一員照磨一員吏屬凡十六人掌孳畜之事

儲膳司秩正三品卿四員少卿二員丞二員主事二員照磨一員令史六人譯史通事知印各二人奏差六人典吏四人掌皇太子飲膳之事

典寶監秩正三品卿太監少監丞各二員經歷知事各一員吏屬八人以上皆詹事院官屬其徽政院屬暫設旋罷不具錄

左都威衛使司秩正三品使三員副使僉事各二員經歷知事照磨各一員至元十六年以侍衛親軍一萬戶撥屬

東宮立侍衛都指揮使司三十一年改隆福宮左都威衛使司隸東宮至大三年選造作軍士八百人立千戶所一百戶翼八以領之而分局造作延祐二年置教授二至治三年罷軍匠千戶所

鎮撫所鎮撫二員都目一員

行軍千戶所千戶副千戶各二員知事彈壓各一員百戶二十員

屯田左右千戶二所千戶二員都目彈壓各一員百戶每所二十員

弩軍千戶所千戶二員都目彈壓各一員

資倉倉大使一員副使一員

右都威衛使司使三員副使僉事各二員經歷知事照磨

各一員中統三年以世祖五投下探馬赤立總管秩四品設總管一員二十一年撥屬東宮二十二年改蒙古侍衛親軍都指揮使司秩正三品三十一年改隆福宮右都威衛使司秩仍舊延祐二年置儒學教授蒙古教以各一員其屬附見

鎮撫所鎮撫二員都目一員

行軍千戶凡五所秩正四品千戶副千戶各五員百戶五十員知事彈壓各五員

屯田千戶所秩正五品千戶二員彈壓一員百戶七員都目一員

廣貯倉秩從九品大使副使各一員攢典一人

衛候直都指揮使司至元二十年以控鶴二百人隸家令

司後立衛候司以領之兼掌東宮儀從金銀器物大德十一年復增懷孟從行控鶴二百人升都指揮使司秩正四品至治三年罷四年以控鶴六百三十人歸中宮位下秦定四年復立司達魯花赤都指揮使各二員皆佩三珠虎符副指揮二員佩雙珠虎符知事一員提控案牘一員令史四人譯史通事各一人奏差二人其屬附見

百戶所凡六秩從七品每所置百戶二員

儀從庫秩從七品大使二員副使一員

內宰司秩三品至元三十一年既立徽政院改家令爲內宰司泰定元年復爲家令司天厯二年復改內宰司內宰六員司丞四員典簿二員照磨一員令史十有一人譯史知印通事各二人奏差六人典吏四人其屬不具錄

內史府內史九員正二品中尉六員正三品司馬四員正四品諮議二員從五品記室二員從六品照磨兼管句承發架閣庫一員從八品掾史八人譯史四人知印通事各二人宣使五人典吏二人至元二十九年封晉王於太祖四斡爾朵之地改王傅爲內史秩從二品置官十四員延祐五年升正二品給印分司京師并分置官屬

延慶司秩正三品掌王府祈禳之事使三員同知二員典簿一員令史二人譯史知印通事各一人奏差二人斷事官秩正三品理王府詞訟之事斷事官十六員正三品經歷知事各一員令史三人

典軍司秩從七品掌控鶴百二十有六人典軍二員副使二員大德四年置

諸王傅官寬徹不花王子至齊王位下凡四十五王每位下各設王傅傅尉司馬三員傅尉唯寬徹不花耶不干幹羅溫三王有之自此以下皆稱府尉別於王傅之下司馬之上而三員竝設又多寡不同或少至一員或多至三員者齊王則又獨設王傅一員

祇應司秩從五品掌內府諸王邸第修禳寺觀營繕領工匠七百戶大使副使各一員直長三員吏目一員司吏二人元初建兩京殿宇始置司以備工役其屬不具列

長信寺秩正三品領大幹爾朵怯憐口諸事卿四員正三品少卿二員從四品寺丞二員從五品經歷知事各一員令史六人譯史知印各二人通事一人奏差四人

怯憐口諸色人匠提舉司秩從五品領大都上都二鐵局并怯憐人匠以材木鐵炭皮貨諸色備斡爾朵各枝房帳之需達魯花赤一員提舉同提舉副提舉各一員吏目一人司吏四人

大都鐵局秩從五品掌斡爾朵上下往來造作裝釘房車大使副使直長各一員

上都鐵局大使一員副使一員品秩職掌如前

長秋寺掌武宗五斡爾朵戶口錢糧營繕諸事卿五員正三品少卿從四品寺丞從五品各二員經歷知事各一員令史六人譯史知印各二人通事一人奏差四人皇慶二年置其屬二

怯憐口諸色人匠提舉司秩從五品掌正宮造作之役

達魯花赤一員同提舉副提舉各一員吏目一人司吏四人屬長信寺

怯憐口諸色人匠提舉司秩從五品掌領武宗軍上北來人匠達魯花赤一員提舉同提舉副提舉各一員吏目一人司吏二人

承徽寺掌武宗皇后位下錢糧營繕等事卿五員正三品少卿從四品寺丞從五品各二員經歷知事各一員令史六人譯史知印各二人通事一人奏差四人至治元年置長寧寺掌英宗皇后位下戶口錢糧營繕等事卿六員正三品少卿從四品寺丞從五品各二員經歷知事各一員吏屬令史六人譯史知印各二人怯里馬赤一人奏差四人至治三年置

長慶寺掌成宗幹爾朵及常歲管辦禾什房子行幸怯薛台人等衣糧之事卿六員少卿寺丞各二員品秩同長寧寺經歷知事各一員令史六人譯史知印各二人怯里馬赤一人奏差四人泰定四年置

寧徽寺隸明宗八不沙皇后位下卿六員少卿四員丞二員品秩同長寧寺經歷知事各一員天祿二年置

延徽寺順帝至元六年中書省奉旨依累朝故事起蓋懿璘質班皇帝幹爾朵置延徽寺以掌之

徽政院順帝元統元年依太皇太后故事爲皇太后置徽政院設立官屬三百六十有六員

資正院順帝至元六年中書省奉旨爲高麗奇氏二皇后置秩正二品院使六員同知僉院同僉院判各二員首領

官經歷都事各一員管句照磨各一員將昭功萬戶府司屬除已罷繕工司外集慶路錢糧并入有司每年驗數撥付資正院其餘司屬並付資正院領之自後正宮皇后崩冊立奇氏爲皇后改置崇正院

中政院院使七員正二品同知二員正三品僉院二員從三品同僉二員正四品院判二員正五品掌中宮財賦營造供給并番衛之事湯沐之邑其幕職則司議二員從五品長史二員正六品照磨兼管句承發架閣庫一員正八品吏屬蒙古必閣赤四人掾史十二人回回掾史二人怯里馬赤二人知印二人宣使十人

中瑞司掌奉寶冊卿五員正三品丞二員正四品典簿二員從七品寫懿旨必閣赤四人譯史一人令史四人

知印一人通事一人奏差二人典吏二人

內正司掌百工營繕之役地產孳畜之儲以供膳服備
賜予卿四員正三品少卿二員正四品丞二員從五品
典簿二員從七品照磨兼管勾一員正九品吏屬各有
差領署二提舉司一及其司屬凡十有六歲賦之額工
作之程終歲則會其數以達焉

尙工署令一員從五品丞二員從六品書史一人書
吏四人掌營繕雜作之役凡百工名數興造程式與
其材物皆經度之而責其成功

玉列赤局秩從七品提領一員大使一員副使一
員直長二員掌裁製縫綫之事

贊儀署秩正五品提領一員大使一員副使一員直

長二員掌車輿器備雜造之事

管領六盤山等處怯憐口民匠都提舉司秩正四品達魯花赤一員都提舉同提舉副提舉各二員知事提控案牘各一員吏四人奏差二人

奉元等路平涼等處開成等處甘肅寧夏等路察罕海子等處長官司凡五處秩正五品各設達魯花赤一員長官副長官各一員提控案牘一員都目一員吏十人延祐二年以民匠提舉司所領地里闊遠人戶散處於政不便乃酌遠近眾寡立長官司提領所以分理之

提領所凡十竝從七品奉元等路鳳翔等處平涼寧環等處開成等處察罕海子等處甘州等路肅

沙等路永昌寧夏等路長城等路皆設提領同提
領副提領各一員典史一員分掌怯憐口地方隸
各長官司

朔正司令五員正三品丞四員正四品典簿二員從七
品照磨一員從八品譯史二人令史六人知印二人通
事奏差典吏各二人掌怯憐口民匠五千餘戶歲辦錢
糧造作以供公上歲終會其出納以達於院而糾其敝
領提舉司二提領所一

管領上都等處諸色人匠提舉司管戶二千五百有
奇達魯花赤一員提舉一員竝從五品同提舉副提
舉各一員直長都目吏目各一員司吏四人部役二
人

管領隨路打捕鷹房納綿等戶提舉司達魯花赤一員提舉同提舉副提舉各一員品秩同上直長都目吏目各一員司吏四人部役二人

管領歸德亳州等處管民提領所秩從七品提領同提領副提領各一員典史一員司吏一人管領歸德楚通等三百五十有六戶

典飲局秩正七品大使副使各二員典史一員攢典一員掌醞造酒醴以供內府及祭祀燕享賓客賜頒之給初置嘉醞局秩六品隸家令皇慶元年撥隸中宮

管領大都等路打捕民匠等戶總管府秩正三品達魯花赤一員總管一員同知副總管各一員經歷知事提控案牘照磨各一員譯史一人令史奏差各四人掌錢

糧造作之事元初平定河南諸郡收聚人戶萬五千有奇置官管領至元八年屬有司後改隸中尙監又置總管府領提舉司十有一提領所二十有五

在京提舉司二分管各處人戶涿州保定眞定冀寧河南大名東平東昌濟南等路提舉司凡九處各設達魯花赤一員提舉同提舉副提舉都目各一員

提領所凡二十五處大都等路東安州濟寧曹州祁州完州河間濟南濟陽大同元氏冀寧晉寧歸德南陽懷孟汝寧衛輝曹州涿州眞定中山平山大名高唐等處每處設提領同提領副提領各一員典史一員

管領諸路打捕鷹房民匠等戶總管府達魯花赤一員

總管一員並正三品同知一員正五品副總管二員從五品經歷二員從七品知事一員從八品提控案牘照磨各一員譯史一人令史四人奏差二人掌錢糧造作之事隸中宮位下領提舉司四提領所十有一舊志此特繁簡不同今刪彼存此

管民提舉司大都等路冀寧等路南陽唐州等處河南路府等處凡四司秩正五品每司設達魯花赤一員提舉同提舉副提舉各一員都目一員吏二人提領所凡十有一大都保定河間真定南陽鄧州濟南嵩汝汴梁裕州汝濟陳州唐州泌陽襄陽湖廣晉寧冀寧等處各設所秩正七品每所提領二員同提領副提領各一員典史一員司吏二人

江浙等處財賦都總管府達魯花赤一員都總管一員
竝正三品同知一員正五品副總管一員從五品經歷
從七品知事照磨提控案牘從九品各一員譯史一人
令史十五人奏差十五人典吏二人掌河南沒入貨產
課其所賦以供內儲至大元年置領提舉司三庫局各

一
平江松江建康等處提舉司凡三處秩竝正五品每
司各設達魯花赤一員提舉同提舉副提舉各一員
都目吏目各一員司吏六人

豐盈庫提領大使副使各一員典吏一人掌收本府
錢帛

織染局使一員典吏一人掌織染歲造段匹

管領種田打捕廩房民匠等戶萬戶府秩正三品掌歸德亳州永宿二十餘城各蒙古漢軍種田戶差稅屬中官位下萬戶一員經歷知事提控案牘各一員令史四人領司屬凡十處

管領大名等處種田諸色戶總管府秩正五品總管副總管各一員都目一員

管領本投下大都等處諸色戶計都達魯花赤秩正五品達魯花赤一員提控案牘一員都目一員

管領大都河間等路打捕廩房總管府秩正五品總管副總管各一員都目一員司吏二人

管領東平等路管民官秩正五品總管副管各一員都目一員吏一人

元史卷八十五
二
管領大名等路宣撫司燕京路管民千戶所秩從七品
提領副提領各一員

管領曹州等處本投下民戶管領東明等處本投下戶
計管領蒲城等處本投下諸色戶計管領汴梁等路本
投下種田打捕驅戶四提領所秩從七品提領同提領
副提領各一員典史各一員司吏各一人

海西遼東哈思罕等處鷹房諸色人匠怯憐口萬戶府
秩正三品達魯花赤一員萬戶副萬戶各一員經歷知
事提控案牘照磨各一員譯史一人掌錢糧造作之事
管領哈思罕等處肇州朵因溫都爾諸色人匠四十戶
仍領鎮撫所千戶所

鎮撫司鎮撫一員吏一人

哈思罕等處打捕鷹房怯憐口千戶所秩從五品達
魯花赤一員千戶副千戶各一員吏目一員司吏四
人彈壓一人部役二人

諸色人匠怯憐口千戶所秩從五品達魯花赤一員
千戶副千戶各一員都目一員司吏四人部役二人
肇州等處女真千戶所達魯花赤一員千戶副千戶
各一員吏目一員司吏四人

朵因溫都爾兀良哈千戶所

輝亦爾等處怯憐口千戶所

開元石州瀋陽遼陽蓋州幹盤六處怯憐口各立千
戶所

遼陽等處金銀鐵冶都提舉司秩正四品都提舉同提

舉副提舉各一員提控案牘一員譯史一人吏六人奏
差二人掌辦金銀砑鐵等課分納中書省及中政院七
年以其賦盡歸中宮

管領本位下怯憐口隨路諸色民匠打捕鷹房都總管
府達魯花赤一員都總管一員並正三品同知一員正
五品副總管一員從五品掌怯憐口二萬九千戶田萬
五千餘頃出賦以備兵奉營繕之事其首領官則經歷
從七品知事從八品照磨從九品各一員吏屬令史十
二人譯史四人通事知印各二人奏差十人典吏六人
舊志此下復有管領諸路打捕鷹房民匠等戶總管府
所領四提舉及十一提領所俱與前無異特文有繁簡
今刪不錄

寶昌庫提領一員大使一員掌受金銀砑鐵之課以待

儲運

金銀場提領所凡七梁家寨銀場明世銀場密務銀場
寶山銀場燒炭峪銀場胡寶峪銀場七寶山砦炭場俱
從七品每所各設提領同提領副提領各一員

鐵冶管句所凡二處各設管句同管句副管句各一員
奉宸庫秩五品提點四員副使二員提控案牘一員庫
子六人掌中藏寶貨錢帛給納之事達魯花赤一員提
舉大使副使各一員提控案牘一員庫子四人掌收支
御膳野物職視生料庫

管領怯憐口諸色民匠都總管府達魯花赤一員總管一
員並正三品同知一員正四品副總管二員正五品經歷
從七品知事從八品提控案牘照磨管句各一員令史十

人知印二人通事一人譯史二人奏差六人典吏四人領怯憐口人匠造作等事至大三年立總管府至治三年罷天祿元年復立隸儲政院其屬不具列

隨路諸色人匠都總管府中統五年命招集析居放良遺俗僧道等戶習諸色匠藝立管領怯憐口總管府以司其造作達魯花赤一員總管二員並正三品同知一員正五品副總管二員從五品經歷知事照磨提控案牘各一員令史四人譯史一人奏差二人典吏一人其屬附見

上都諸色民匠提舉司秩從五品提舉一員同提舉副提舉吏目各一員

金銀器盒局染局雜造局泥瓦局鐵局上都胡盧局以上皆大使副使各一員秩皆正八品

器物局硃金局鞍子局皆大使一員

雲州管納色提領所提領一員掌納色人戶

大都等路諸色人匠提舉司秩從五品提舉同提舉副提舉各一員至元十六年置其屬不具錄

成製提舉司秩從五品達魯花赤一員提舉一員同提舉副提舉各一員吏目一員司吏四人部役二人掌縫製之事受院劄

上都大都貂鼠軟皮金絲畫油氈玉等局提領所提領二員從六品受省劄其屬不具列

上都奧魯提領所提領同提領各一員掌理人匠詞訟至元十八年置受詹事院劄

上都異樣毛子局上都氈局上都斜皮等局皆大使副

使各一員至元二十年置受詹事院劄

蔚州定安等處山場采木提領所秩正八品提領一員
大使一員副使二員至元十二年置

上都隆興等路雜造鞍子局提領一員大使一員直長
二員至元二十二年置受詹事院劄

眞定路冀州雜造局大使一員副使一員掌造作之事
至元十九年置

管領大都等路打捕鷹房膳粉人戶總管府秩正四品隸
皇太后位下達魯花赤一員總管一員首領官一員令史
四人譯史一人奏差二人

管領本投下大都等路怯憐口民匠總管府元初招集怯
憐口哈赤民匠千一百餘戶中統元年立總管府二年給

六品印掌戶口錢帛差發等事至元九年撥隸安西王位下皇慶元年又屬公主皇后位下延祐元年改隸章慶司天厯二年又改隸儲政院達魯花赤一員總管一員俱受御寶聖旨同知一員副總管一員俱受安西王令旨知事一員令史二人其屬附見

織染提舉司秩正七品掌織造段匹提舉一員受安西王令旨同提舉一員本府擬人副提舉一員都目一員俱受安西王傳劄

管民提領所凡三大都路兼奉聖州提領六員曹州河間路提領各二員受本府劄

管地提領所凡二奉聖州東安州提領各三員受本府劄

管領諸路怯憐口民匠都總管府至元元年招集析居從良還俗僧道編籍人戶爲怯憐口立總管府以領之十四年以所隸戶口善造作屬中宮立織染雜造二局以司造作立提領所以司徭役延祐六年改繕用司七年復改府達魯花赤一員總管一員竝正三品同知二員正五品副總管二員從五品經歷知事提控案牘兼照磨各一員令史五人譯史一人其屬附後

各處管民提領所秩正七品河間益都保定冀寧晉寧大名濟寧衛輝宣德汴梁曹州大同開元大寧上都濟南眞定大都歸德鄂漢共二十一所提領同提領副提領各一員相副官各一員大都增一員典史司吏各一人

織染局雜造局弘州衣錦局豐州毛子局縉山毛子旋
匠局皆秩正七品大使副使各一員典史司吏各一人
徐邳提舉司秩正五品提舉同提舉副提舉各一員吏
目司吏各一人

廣備庫大使副使各一員俱受院劄

汴梁等路管民總管府秩正三品達魯花赤總管同知府
判各一員經歷知事提控案牘各一員元初立息州總管
府領歸附六千三百餘戶元貞元年又并壽潁歸附民戶
二千四百餘戶改汴梁等路管民總管府掌各屯佃戶差
發子粒隸徽政院泰定元年改隸詹事院後隸儲政院其
屬庫一提領所八管佃提領十二不具錄

江淮等處財賦都總管府達魯花赤總管各一員並正三

品同知一員正五品副總管二員從五品經歷知事照磨兼提控案牘各一員令史十五人奏差十五人譯史一人典吏三人至元十六年以宋謝太后福王所獻事產及賈似道地土劉堅等田立總管府以治之

昭功萬戶都總使司都總使二員正三品同知一員從三品副使二員正四品經歷知事照磨各一員令史六人譯史六人知印二人怯里馬赤二人奏差六人典吏四人至順二年立凡文宗潛邸扈從之臣皆領於是府其屬則宮相繕工等司

宮相都總管府秩正三品達魯花赤二員都總管一員副達魯花赤二員同知二員副總管二員經歷知事提控案牘承發架閣庫各一員至順二年罷宮相府并鶴

馭司改怯憐口錢糧總管府爲本府

織染雜造人匠都總管府秩正三品達魯花赤一員
總管一員同知一員副總管二員經歷知事提控案
牘照磨各一員元初招收析居放良還俗僧道及隨
路漏籍不當差人戶爲工匠置局教習織造至元十
二年以賜東宮元貞中隸徽政院天祿元年改隸儲
慶使司三年改屬宮相

管領諸路打捕鷹房納綿等戶總管府秩正三品達
魯花赤都總管同知治中府判各一員經歷知事提
控案牘各一員掌人匠萬三千有奇歲辦稅糧皮貨
采捕野物鷹鷂以供內府至元十二年賜東宮位下
遂以眞定所立總管府移置大都隸詹事院三十一

年詹事院罷隸徽政延祐六年又隸詹事天厯元年隸儲慶使司至順元年改屬宮相府

管領上都等處打捕鷹房納綿等戶大使司大使副使各一員此外順德冀寧大都固安中山濟南德州益都大同濟寧興和晉寧檀州大寧薊州真定趙州保定冀州汴梁凡二十處皆置打捕鷹房納綿等戶提領所提領副提領各一員又順州懷慶各置管領稻田提領所提領副提領各一員又廣衍庫大使一員管領滑山炭場所一員

繕工司秩正三品卿二員少卿二員丞二員經歷知事照磨兼提控案牘管勾承發架閣各一員令史四人譯史二人知印二人怯里馬赤一人典史三人掌人匠營

造之事天祿二年置其屬附見

一金玉珠翠提舉司一大都織染提舉司一大都雜
造提舉司各置達魯花赤提舉同提舉副提舉各一
員吏目一員司吏四人

元史卷八十五終

元史卷八十六

志七之六

百官六

都畿行省文武職司及勳爵官階職制

大都畱守司掌守衛宮闕都城調度本路供億諸務兼理營繕內府諸邸都宮原廟尙方車服殿廡供帳內苑花木及行幸湯沐宴游之所門禁關鎖啟閉之事畱守五員正二品同知二員正三品副畱守二員正四品判官二員正五品經歷一員從六品都事二員從七品管勾承發架閣庫一員正八品照磨兼覆料官一員部役官兼壕寨一員令史十八人宣使十七人典吏五人知印二人蒙古必闌赤三人回回令史一人通事一人至元十九年罷宮殿府行工部置大都畱守司兼本路都總管知少府監事二十一年別置大都路都總管府治民事并少府監歸畱守司

皇慶元年別置少府監延祐七年罷少府監復以畱守兼監事其屬附見

修內司秩從五品領十四局人匠四百五十戶掌修建宮殿及大都造作等事提點大使副使各一員直長五員吏目照磨各一員部役七員司吏六人工匠千二百七十有二戶其屬不具列

大都城門尉秩正六品尉二員副尉一員掌門禁啟閉管鑰之事至元二十年以四怯薛八刺哈赤爲之二十四年復以六衛親軍參掌凡十有一門曰麗正曰文明曰順承曰平則曰和義曰肅清曰安貞曰健德曰光熙曰崇仁曰齊化每門設官如上

犀象局秩從六品大使副使直長各一員司吏一人

掌兩都宮殿營繕犀象龍牀卓器繫腰等事中統四年
置設官一員至元五年增副使管匠戶百有五十其屬
不具列

武備寺掌繕治戎器兼典受給卿四員正三品同判六員
從三品少卿四員從四品丞四員從五品經歷知事各一
員照磨兼提控案牘一員承發架閣庫管勾一員辨驗弓
官二員辨驗筋角翎毛等官二員令史十有三人至元五
年始立軍器監秩四品又改爲武備監隸衛尉院二十一
年改監爲寺與衛尉並立其所轄屬官則自爲選擇其匠
戶之能者任之

壽武庫利器庫庫廣勝庫秩並從五品各設提點大使副
使各一員庫子各十人

大同路軍器人匠提舉司達魯花赤一員提舉一員並從五品同提舉正七品副提舉正八品各一員其屬豐州應州平地縣山陰縣各有甲局院長一員白登縣甲局頭目一人豐州弓局使一員塞甫丁弓局頭目一人大都上都保定真定遼河蔚州宣德大寧通州薊州平陽等處各置軍器人匠提舉司秩正六品達魯花赤一員提舉同提舉副提舉各一員其屬本路投下雜造局或設大使副使各員其弓局甲局或大使或院長各一員

大原路懷孟路汴梁路彰德大名東平奉聖州欠州豐州許州咸平府隆興路平灤路各置軍器人匠局秩正七品達魯花赤局使副使各一員其屬有甲局箭局弓

局或設院長或設頭目

大都弓匠提舉司秩正五品達魯花赤提舉同提舉副提舉各一員其屬雙塔弓局大使副使各一員成吉里弓局大使副使各一員通州弓局院長一員

大都絃局大使副使各一員陵州箭局頭目一人安平縣蓋州廣平路各設甲局大使院長各一員

陳州歸德汝寧府各設軍器局院長一員

太僕寺掌阿塔思馬匹受給造作鞍轡之事中統四年設羣牧所又改尙牧監又改太僕院又改衛尉院後立太僕寺又別置尙乘寺以管鞍轡而本寺止管阿塔思馬匹卿二員從二品少卿二員從四品丞二員從五品經歷知事照磨管勾各一員令史七人譯史知印通事各二人奏差

四人回回令史一人典吏二人

尙乘寺掌上御鞍轡輿輦阿塔思羣牧騶馬驢騾及領隨路局院鞍轡等造作收支行省歲造鞍轡理四怯薛阿塔赤詞訟起取南北遠方馬匹等事卿四員從三品少卿二員從四品丞二員從五品經歷知事照磨管勾各一員令史六人譯史二人知印二人通事二人奏差五人典吏二人至元二十四年罷衛尉院始設尙乘寺領資乘庫

資乘庫提點四員從五品大使三員正六品副使四員正七品庫子四人掌收支鞍轡等物

上都畱守司兼本路都總管府品秩職掌如大都畱守司而兼治民事車駕還大都則領上都諸倉庫之事畱守六員同知二員副畱守二員判官二員品秩竝同大都畱守

司經歷二員都事四員照磨一員令史四十四人譯史六人回回令史三人通事知印各二人宣使十二人元初置開平府中統四年改上都路總管府至元十九年改爲上都留守司兼本路都總管府其屬不具列

尙供總管府掌守護東涼亭行宮及遊獵供需之事達魯花赤一員總管一員竝正三品同知一員從四品副總管一員從五品判官一員正六品經歷知事提控案牘各一員令史譯史知印奏差有差其屬不具列

雲需總管府掌守護察罕海子行宮及行營供辦之事達魯花赤一員總管一員竝正三品同知一員從四品副總管一員從五品判官一員正六品經歷知事提控案牘各一員延祐二年置

大都路都總管府秩正三品達魯花赤正副各二員都總管一員同知治中判官推官經歷知事各二員提控案牘四員照磨兼管勾一員令史九十有五人譯史二人回回令史一人通事知印各二人奏差二十一人元初爲燕京路總管大興府中統五年稱中都路至元九年改號大都二十一年始置總管府領府一州十有一凡本府官吏唯達魯花赤一員及總管推官專治本路政事其餘皆分任供需之事故又號曰供需府焉

大都路兵馬都指揮使司凡二秩正四品掌京城盜賊姦偽鞠捕之事都指揮使二員副指揮使五員知事一員提控案牘一員吏十四人一置司於北城一置司於南城司獄司凡三秩正八品司獄一員獄丞一員獄典二人

掌囚繫獄具之事一置於大都路一置於北城兵馬司
通領南城兵馬司獄事皇慶元年以兩司異禁遂分置
一司於南城

左右警巡二院秩正六品達魯花赤各一員使各一員
副使判官各三員典史各三員司吏各二十五人至元
六年置領民事及供需視大都路大德五年分置供需
院以副使判官典史各一員主之

大都警巡院品職分置如左右院達魯花赤一員使一
員副使二員判官二員典史二員司吏二十人大德九
年置以治都城之南至正十八年又於大都在城四隅
各立警巡分院官吏視本院減半

大都路提舉學校所秩正六品提舉一員教授二員學

正二員學錄一員至元二十四年既立國學以故孔子廟爲京學而提舉學事者仍以國子祭酒繫銜

管領諸路打捕鷹房總管府秩正三品達魯花赤正副各一員總管副總管同知各一員經歷知事各一員

宛平縣秩正六品達魯花赤一員尹一員丞三員主簿三員尉一員典史三員司吏二十六人治大都麗正門以西

大興縣秩正六品達魯花赤一員尹一員丞一員主簿二員尉一員典史三員司吏十五人治大都麗正門以東

東關廂巡檢司秩從九品巡檢三員司吏一人掌巡捕盜賊奸宄之事

西北南關廂兩巡檢司設置竝同上

行中書省掌各路軍民財賦統郡縣鎮邊鄙與都省爲表

裏元初有征伐之役分任軍民之事皆稱行省與行樞密

院行尙書省迭爲廢置

皆有便宜承制之權而無職名

因事設官官不必

備中統至元間始分立行中書省或僅至參政僉省同僉

皆以省官出領其事卽設丞相皆以宰執行某處省事繫

銜故使相與內相鈞權其後嫌於外重改爲某處行中書

省平章若左右丞參政罷丞相不設而其體始不與都省

侔矣至元至大間兩改行尙書省尋復如舊自世祖後天

下爲行省者凡十有一至順帝又析增山東廣西各行省

每省丞相一員平章二員竝從一品右丞左丞各一員正

二品參知政事二員從二品甘肅嶺北二省各減一員郎

中二員從五品員外郎二員從六品都事二員從七品掾史蒙古必闡赤回回令史通事知印宣使各省設員有差舊制參政之下有僉省同僉之屬後罷不置丞相或置或不置尤慎於擇人故往往缺焉

河南江北等處行中書省至元五年詔參政阿里僉行省事於河南等路立省二十八年以河南江北係要衝之地又新入版圖宜於汴梁立省以控治之遂署其地統有河南十二路七府

江浙等處行中書省至元十三年初置江淮行省治揚州二十一年以地理民事非便遷於杭州二十二年割江北諸郡隸河南改曰江浙行省統有三十路一府

江西等處行中書省至元十四年置十五年并入福建行

省十七年仍置省於龍興府而福建自爲行省治泉州二十二年以福建行省并入江西二十三年又以福建省并入江浙本省統有十八路

湖廣等處行中書省至元十一年右丞相伯顏伐宋行中書省事於襄陽尋以別將分省鄂州爲荊湖等路行中書省十三年取潭州卽署省治之十八年復徙置鄂州統有三十路三府

陝西等處行中書省中統元年以商挺領秦蜀五路四川行省事三年改立陝西四川行中書省治京兆至元三年移治利州十七年復還京兆十八年分省四川尋改立四川宣慰司二十一年仍合爲陝西四川行省二十三年四川立行樞密院本省所轄之地惟陝西四路五府

四川等處行中書省元初其地總於陝西至元十八年以陝西行中書分省四川二十三年始置四川行省署成都統有九路五府

遼陽等處行中書省至元二十四年置治遼陽路統有七路一府

甘肅等處行中書省中統二年立行省於中興十年罷之十八年復立二十二年復罷改立宣慰司二十五年徙置中興省於甘州立甘肅行省三十一年分省按治寧夏尋并歸之本省治甘州路統有七路二州

嶺北等處行中書省元初太祖定都於哈刺和林河之西因名其城曰和林立元昌路中統元年世祖遷都大興始置宣慰司都元帥府大德十一年改立和林等處行中書

省右左丞相各一員旋省其一皇慶元年改嶺北等處行中書省治和寧路統有金嶺以北邊地

雲南等處行中書省卽古南詔之地初世祖征取以爲郡縣嘗封建宗王鎮撫其軍民至元十一年始置行省治中慶路統有三十七路五府

征東等處行中書省至元二十年以征日本國命高麗王置省典軍興之務師還而罷大德三年復立行省以中國之法治之旣而王言其非便詔罷行省從其國俗至治元年復置以高麗王兼領丞相得自奏選屬官治瀋陽統有二府一司五道

各省屬官

檢校所檢校一員從七品書吏二人

照磨所照磨一員正八品

架閣庫管勾一員正八品

理問所理問二員正四品副理問二員從五品知事一員提控案牘一員

都鎮撫司都鎮撫一員副都鎮撫一員

行中書省至順帝至正十二年又增置淮南江北等處行中書省於揚州以淮西宣慰司兩淮鹽運使揚州淮安徐州唐州安豐蘄黃皆隸焉兼提調淮南王傅府事十六年置福建等處行中書省於福州鑄印設官一如各處行省之制十七年置山東行省十八年福建行省右丞朵台分省建寧參政訥都赤分省泉州二十三年置廣西行中書省以廉訪使耶爾吉尼爲平章政事又置膠東行省於萊

陽總制東方事二十六年置福建江西等處行中書省
增置中書分省至正十一年分省於濟寧以松壽爲參知
政事置兵刑工戶四部十二年二月分省於彰德以玉樞
虎吐華爲右丞韓大雅爲左丞帖里帖木爾爲參政旋升
平章政事十七年七月分省於陵州以荅蘭爲平章俺普
崔敬爲參政十一月分省於冀寧以臧卜爲平章十八年
三月賊掃地王沙劉二陷冀寧臧卜遁五月總兵官察罕
帖木爾遣兵來冀寧鎮守臧卜復回旋卒二十年以不花
爲分省右丞王時爲分省參政三月賊鐵甲韓至分省官
皆遁二十一年以平章荅蘭鎮守二十二年召還京師以
左丞刺馬乞刺參政脫禾爾領分省事二十三年又以平
章愛不花鎮之八月擴廓兵至冀寧分省遂罷二十七年

八月分省於保定以添設平章蠻子兼知院九月命太保左丞相耶速統領軍馬分省於山東沙藍荅里仍中書左丞相知樞密院分省大同以哈刺那海爲平章阿刺不花爲參政又置分省於冀寧升冀寧總管爲參政鑄印與之凡事必咨大同分省而後行十月又置分省於眞定

增設兵馬司至正十年中書省奏東南千里外妖氣見合立兵馬司四處掌防禦之職遂置大名兵馬司東平兵馬司濟南兵馬司徐州兵馬司每司置都指揮指揮各二員副指揮各四員經歷知事提控案牘各一員譯史各二人司吏各十二人奏差各八人貼書各二十四人忽刺罕赤各三十人司獄各一員獄丞各一員十一年罷沂州分元帥府改立兵馬指揮使司

宣慰司掌軍民之務分道以總郡縣行省有政令則布於下郡縣有請則爲達於省有邊陲軍旅之事則兼都元帥府其次則止爲元帥府其在遠服又有招討安撫宣撫等使品秩員數各有差等

宣慰使司每司宣慰使三員從二品同知一員從三品副使一員正四品經歷一員從六品都事一員從七品照磨兼架閣管勾一員正九品凡七道

山東東西道

益都路置至正六年改兼都元帥府

河東山西道

大同路置

淮東道

揚州置至正十五年兼都元帥府招募濠泗義兵

浙東道

慶元路置

荊湖北道

中興路置至正十二年兼都元帥府

湖南道

天臨路置順帝至元年兼都元帥府

河南道

至正十九年置於洛陽

宣慰使司都元帥府秩從二品使三員同知二員副使經歷都事各二員照磨一員

廣東道

廣州置

大理金齒等處

蒙慶等處

右二府設官如上唯蒙慶一府使二員同知副使各

一員經歷都事亦減一員

廣西兩江道

靜江路置

海北海南道

福建道

八番順元等處

察罕海子等處

右五府宣慰使都元帥三員副都元帥僉都元帥事

各二員餘同上

興元等處

至正十五年置

江州等處

至正十六年置

雲南邦牙等處

順帝至元四年置

甘肅永昌等處

本闕端大王封地順帝至正三年以無嗣絕封改置

宣慰使兼管軍萬戶府每府宣慰使三員同知副使各一

員經歷一員都事二員照磨一員

曲靖等路

羅羅斯

臨安廣西道元江等處

都元帥府都元帥二員副元帥二員經歷知事各一員

北庭

隸吐蕃宣慰司
元貞元年置

曲先塔林

都元帥三員
元貞元年置

蒙古軍

征東

二府都元帥各
一員副一員

東路蒙古軍

至正八
年置

元帥府秩正三品達魯花赤一員元帥一員經歷知事各

一員

李店文州

帖城河里洋脫

朵甘思

當陽

岷州

積石州

洮州路

脫思馬路

十八族

右九府唯李店文州增置同知副元帥各一員其餘

八府隸吐蕃宣慰司設官竝同

河淮水軍

至正二十六年置於孟津

分元帥府

汀漳二州

至正八年置

沂州

至正八年置

登州 至正十一年置

湖南寶慶路 至正十一年置

安東安豐 至正十二年置

右分元帥府五處皆至正間盜起增設

宣撫司秩正三品每司達魯花赤一員宣撫一員同知副使各二員僉事一員計議經歷知事各一員提控案牘架閣庫一員其四川紹熙軍民宣撫司至元初旋設卽罷今不復列惟至正末增者列之

廣南西道 不置副使僉事

麗江路 以上隸雲南省

順元等處

播州

思州

以上隸湖廣省

敘南等處

隸四川行省不置僉事計議

平緬

至正十五年以雲南死可伐等降置

安撫司秩正三品每司達魯花赤一員安撫使一員同知

副使僉事各一員經歷知事各一員

師壁洞

不置達魯花赤

永順等處

至正十一年改升宣撫司

散毛洞

松潘疊宕威茂州等處

至大二年改升宣撫司

碯門魚通黎雅長河西寧遠等處

舊史成宗紀大德二年置宣撫司本志宣

政院下作安撫司互異

忠孝軍

至正十一年罷四川省所轄大奴管勾等洞長官司爲忠孝軍民府十五年詔改置

忠義軍

至正十五年罷四川羊母甲洞
吳南王洞置以上隸四川省

羅番遏蠻軍

不置達
魯花赤

程番武盛軍

金石番太平軍

臥龍番南寧州

小龍番靜蠻軍

不置同
知副使

大龍番應天府

洪番永盛軍

方番河中府

盧番靜海軍

不置
知事

新添葛蠻

以上隸
湖廣省

招討司秩正三品達魯花赤一員招討使一員經歷一員

吐蕃

刺馬岡等處

天全

倅不思

沿邊溪洞

以下各置副使一員無達魯花赤

唆尼

成宗紀元貞元年立校釐招討司校釐即唆尼之譯音

諸番

征沔

沔即緬之譯音

長河西裏管軍

擔裏管軍

脫思馬田地

諸路萬戶府

上萬戶府管軍七千之上達魯花赤一員萬戶一員俱正三品虎符副萬戶一員從三品虎符

中萬戶府管軍五千之上達魯花赤一員萬戶一員俱從三品虎符副萬戶一員正四品金牌

下萬戶府管軍三千之上達魯花赤一員萬戶一員俱從三品虎符副萬戶一員從四品金牌其官皆世襲有功則升之每府設經歷一員知事一員提控案牘一員鎮撫司鎮撫二員蒙古漢人參用上萬戶府正五品中萬戶府從五品俱金牌下萬戶府正六品銀牌上千戶所管軍七百之上達魯花赤一員千戶一員俱從四品金牌副千戶一員正五品金牌中千戶所管軍五百之上達魯花赤一員千戶一員

俱正五品金牌副千戶一員從五品金牌

下千戶所管軍三百之上達魯花赤一員千戶一員俱從五品金牌副千戶一員正六品銀牌

彈壓二員蒙古漢人參用上千戶所從八品中下二所正九從九品內銓注

上百戶所百戶二員蒙古漢人各一俱從六品銀牌下百戶所百戶一員從七品銀牌

宣化鎮南五路軍民千戶所

至正十五年置於四川

團練安撫勸農使司至正十八年置其奉元延安等處置於耀州鞏昌等處置於邠州以行省丞相行臺大夫領之各設參謀一人每道置使二人同知副使各二人檢督六人經歷知事照磨各一人

防禦使至正十七年準山東分省咨團結義兵每州增設州判一員每縣增設主簿一員詔有司正官俱兼防禦使事聽宣慰使司節制

屯田使司至正十五年置軍民屯田使司於沛縣正三品屯田打捕總管府順帝至元四年升兩淮屯田打捕總管府正三品

黎兵萬戶府元統二年以海南僻在極邊南接占城西連交趾環海四千餘里中盤百洞黎獠雜居立萬戶府以鎮之萬戶三員正三品千戶所十三處正五品每所領百戶所八處正七品

水軍萬戶府至正十三年置水軍都萬戶府於崑山州以浙東宣慰使納麟哈剌爲正萬戶宣慰使董搏霄副之十

四年立鎮江水軍萬戶府命江浙行省右丞佛家奴領之
十五年置水軍萬戶府於黃河小清河口

義兵萬戶府至正十四年二月詔河南淮南兩省並立義
兵萬戶府又置南陽鄧州等處毛胡盧義兵萬戶府募土
人爲軍免其差役令討賊自効先是鄉人自相團結號毛
胡盧故因以名之十五年又置汴梁等處義兵萬戶府又
置忠義忠勤萬戶府於宿州及武安州

招討軍民萬戶府至正二十年以鞏縣爲招討軍民萬戶
府二十六年置嵩州軍民招討萬戶府

義兵千戶所至正十年於廣西平樂等古城竹山院桑江
隘尊化鄉刺場嶺湖南道州路武岡路湖北靖州路等處
置義兵千戶所每所置千戶一員彈壓一員百戶十員仍

於義兵內推選才勇功能充千戶彈壓百戶之職首領官
都目各一員於本省都吏目選內注授竝從本道帥府節
制湖南道州二處千戶所於帥府分司處設立本司調遣
湖北靖州一處從本省標撥鎮守調遣總定九十六員十
三年又立義兵千戶水軍千戶於江西

奉使宣撫至正五年十月遣官分道奉使宣撫布宣德意
詢民疾苦疏滌冤滯調除煩苛體察官吏賢否明加黜陟
有罪者四品以上停職申請五品以下就便處決民間一
切興利除害之事悉聽舉行其餘必合上聞者條具入告
兩浙江東道以江西行省左丞忽都不丁吏部尙書何執
禮爲之宣政院都事吳密爲首領官江西福建道以雲南
行省右丞散散將作院使王士弘爲之國子典簿孟昉爲

首領官江南湖廣道以大都路達魯花赤拔寶江浙參政
秦從德爲之畱守司都事月忽難爲首領官海北廣東道
以平江路達魯花赤左荅納失理都水使賈惟冀爲之都
水照磨楊文在爲首領官燕南山東道以資正院使蠻子
兵部尙書李獻爲之大醫院都事賈魯爲首領官河東陝
西道以兵部尙書不花樞密院判官靳義爲之翰林應奉
王繼善爲首領官山北遼東道以宣政院同知伯家奴宣
徽僉院王耶速迭爾爲之工部主事明理不花爲首領官
雲南省以荊湖宣慰阿乞刺兩浙鹽運使杜德遠爲之通
政院都事楊矩爲首領官甘肅永昌道以上都畱守阿牙
赤陝西行省左丞王紳爲之沁源縣尹喬遜爲首領官四
川省以大都畱守荅爾麻失里河南參政王守誠爲之宣

政院都事武祺爲首領官京畿道以西臺中丞定定集賢
侍講學士蘇天爵爲之太史院都事雷思誠爲首領官江
南江北道以吏部尙書定僧宣政院僉院魏景道爲之中
書檢校哈爾丹爲首領官至正十七年詔以中書左丞耶
先不花御史中丞成遵奉使宣撫彰德大名廣平東昌東
平曹濮等處獎厲將帥

經略使至正十八年命經略使問民疾苦招諭叛逆果有
怙終不悛總督一應大小官吏治兵練卒審成算申紀律
先定江西湖廣江浙福建諸處并力平復江南各省其義
民姓名不能上達者量才驗功授以官爵旌表孝順節義
高年耆德常令有司存恤鰥寡孤獨選官二員爲經略使
參謀官辟名士一人掌案牘設行軍司馬一員秩正五品

掌軍律

儒學提舉司秩從五品各處行省所署之地皆置一司凡諸路府州縣學校祭祀教養錢糧之事及考校呈進撰述文字每司提舉一員從五品副提舉一員從七品吏目一員司吏二人

蒙古提舉學校官提舉從五品同提舉從七品各一員至元十八年置惟江浙湖廣江西三省有之餘省不置官醫提舉司秩從六品提舉同提舉副提舉各一員掌醫戶差役詞訟至元二十五年置河南江浙江西湖廣陝西五省各立一司餘省無

兩淮都轉運鹽使司至元十四年始置司於揚州使二員正三品同知一員正四品副使一員正五品運判二員正

六品經歷一員正七品知事一員從八品照磨一員從九品三十年悉罷所轄鹽司以其屬置場官大德四年復置批驗所於真州采石等處

鹽場二十九所每場司令一員從七品司丞一員從八品管勾一員從九品辦鹽各有差

呂四場 餘東場 餘中場 餘西場 西亭場

金沙場 石港場 掘港場 豐利場 馬塘場

拼茶場 角斜場 富安場 安豐場 梁垛場

東臺場 河垛場 丁奚場 小海場 草堰場

白駒場 劉莊場 五祐場 新興場 廟灣場

莞瀆場 板浦場 臨洪場 徐瀆浦場

批驗所每司提領一員正七品大使一員正八品副使

一員正九品掌批驗鹽引

兩浙都轉運鹽使司秩正三品使二員同知運判各二員
經歷知事照磨各一員至元十四年置司杭州大德三年
定其產鹽之地立場有差仍於杭州嘉興紹興溫台等處
設檢校四所專驗鹽袋毋過常度

鹽場三十四所每所司令一員從七品司丞一員從八
品管勾一員從九品

仁和場 許村場 西路場 下沙場 青村場

表部場 浦東場 橫浦場 蘆瀝場 海沙場

鮑郎場 西興場 錢清場 三江場 曹娥場

石堰場 鳴鶴場 清泉場 長山場 穿山場

袋山場 玉泉場 蘆花場 大嵩場 昌國場

永嘉場

雙穗場

天富

南監

長林場

黃巖場

杜濱場

天富

北監

長亨場

龍頭場

福建等處都轉運鹽使司秩正三品使二員同知二員運判二員經歷知事各一員照磨一員至元十四年始立市舶司領煎鹽徵課之事二十四年改立鹽運使司徑隸行省

鹽場七所每所司令一員從七品司丞一員從八品管句一員從九品

海口場

牛田場

上里場

惠安場

潯美場

浯州場

泃州場

廣東鹽課提舉司至元十三年始從廣州煎辦鹽課十六年隸江西鹽鐵茶都轉運司二十二年并入宣慰司二十

三年置市舶提舉司大德四年改廣東鹽課提舉司提舉一員從五品同提舉一員從六品副提舉一員從七品其屬附見

鹽場十三所每所司令一員從七品司丞一員從八品管勾一員從九品

靖康場	歸德場	東莞場	黃田場	香山場
埕洞場	雙恩場	咸水場	漆水場	石橋場
隆井場	招收場	小江場		

四川茶鹽轉運司成都鹽井九十五處散在諸郡山中至元二年置興元四川轉運司專掌熬煎辦課之事十八年并入四道宣慰司十九年復立陝西四川轉運司通轄諸課程事二十四年置四川茶鹽運司秩從三品使一員同

知副使運判各一員經歷知事照磨各一員

鹽場十二所每所司令一員從七品司丞一員從八品
管勾一員從九品

簡鹽場 隆鹽場 綿鹽場 潼川場 遂寧場

順慶場 保寧場 嘉定場 長寧場 紹慶場

雲安場 大寧場

廣海鹽課提舉司至元三十一年置專職鹽課秩正四品
都提舉二員從四品同提舉從五品副提舉從六品各一
員知事一員提控案牘一員

市舶提舉司至元二十三年立鹽課市舶提舉司隸廣東
宣慰司三十年立海南博易提舉司至大四年罷之禁下
番船隻延祐元年弛其禁改立泉州廣東慶元三市舶提

舉司每司提舉二員從五品同提舉從六品副提舉從七品各二員知事一員

海道運糧萬戶府至元二十年置掌每歲海道運糧供給大都達魯花赤一員萬戶一員竝正三品副萬戶四員從三品經歷一員從七品知事一員從八品照磨一員從九品鎮撫二員正五品至正十五年升台州海道巡防千戶所爲防禦海道運糧萬戶府置分府於平江

海運千戶所秩正五品達魯花赤一員千戶二員竝正五品副千戶三員從五品若溫台若慶元紹興若杭州嘉興若崑山崇明常熟江陰等處凡五所而平江又有海運香莎稷米千戶所

諸路寶泉都提舉司至正十年十月置其屬有鼓鑄局正

七品永利庫從七品掌鼓鑄至正銅錢印造交鈔

各處寶泉提舉司至正十一年置寶泉提舉司於河南行省及濟南冀寧等處凡九所江浙江西湖廣行省各一所十二年置銅冶場於饒州路德興縣信州路鉛山韶州岑水凡三處每所置提領一員大使副使各一員流官內銓注直隸寶泉提舉司掌浸銅事

諸路總管府至元初置二十年定十萬戶之上者爲上路十萬戶之下者爲下路當衝要者雖不及十萬戶亦爲上路上路秩正三品達魯花赤一員總管一員並正三品兼管勸農事江北則兼諸軍奧魯同知治中判官各一員下路秩從三品不置治中員而同知如治中之秩餘悉同上至元二十三年置推官二員專治刑獄下路一員經歷一

員知事一員或二員照磨兼承發架閣庫一員司吏無定額隨事繁簡以爲多寡之數譯史通事各一人其屬附見儒學教授一員秩九品諸路各設一員及學正一員學錄一員其散府上中州亦設教授一員下州設學正一員又蒙古教授醫學教授陰陽教授各一員

司獄司司獄一員丞一員

平準行用庫提領大使副使各一員

織染局雜造局及府倉各置大使副使各一員

惠民藥局提領一員

稅務提領一員大使副使各一員

錄事司秩正八品凡路府所治置一司以掌城中戶民之事中統二年詔驗民戶定爲員數二千戶以上設錄

事司候判官各一員二千戶以下省判官不置至元二十年置達魯花赤一員省司候以判官兼捕盜之事典史一員若城市民少則不置司歸之附郭縣在兩京則爲警巡院獨杭州置四司後省爲左右兩司

散府秩正四品達魯花赤一員知府或府尹一員領勸農奧魯與路同同知一員判官推官知事提控案牘各一員所在有隸諸路及宣慰司行省者其制各有差等

諸州中統五年并立州縣未有差等至元三年定一萬五千戶之上者爲上州六千戶之上者爲中州六千戶之下者爲下州江南旣平又定其地五萬戶之上者爲上州三萬戶之上者爲中州不及三萬戶者爲下州於是升縣爲州者四十有四縣戶雖多附路府者不改上州達魯花赤

州戶秩正四品同知正六品判官正七品中州達魯花赤
知州竝正五品同知從六品判官從七品下州達魯花赤
知州竝從五品同知正七品判官正八品兼捕盜之事參
佐官上州知事提控案牘各一員中州吏目提控案牘各
一員下州吏目一員或二員

諸縣至元三年合并江北州縣六千戶之上者爲上縣二
千戶之上者爲中縣不及二千戶者爲下縣二十年又定
江淮以南三萬戶之上者爲上縣一萬戶之上者爲中縣
一萬戶之下者爲下縣上縣秩從六品達魯花赤一員尹
一員丞一員簿一員尉一員典史二員中縣秩正七品不
置丞餘悉如上縣之制下縣秩從七品置官如中縣民少
事簡之地則以簿兼尉尉主捕盜之事別有印典史一員

巡檢司巡檢一員

諸軍唯邊遠之地有之各統屬縣其秩如下州其設官置吏亦如之

諸蠻夷長官司西南夷諸溪洞各置焉秩如下州達魯花赤有長有副參用其土人

各處脫脫禾孫掌辨使臣奸偽正一員從五品副一員正七品

勳階十

上柱國

正一品

柱國

從一品

上護軍

正二品

護軍

從二品

上輕車都尉

正三品

輕車都尉

從三品

上騎都尉

正四品

騎都尉

從四品

驍騎尉

正五品

飛騎尉

從五品

爵八等

王正一品

郡王從一品

國公正一品

郡公從二品

郡侯正三品

郡侯從三品

郡伯正四品

郡伯從四品

縣子正五品

縣男從五品

右勳爵若上柱國郡王國公時有除拜者餘則止於封贈用之

文散官四十二階

開府儀同三司

儀同三司

特進

崇進

金紫光祿大夫

銀青光祿大夫以上正一品

光祿大夫

榮祿大夫以上從一品

資德大夫

資政大夫

資善大夫

以上正二品

正奉大夫

通奉大夫

中奉大夫

以上從二品

正議大夫

通議大夫

嘉議大夫

以上正三品

太中大夫

中大夫

亞中大夫

以上從三品舊爲少中延祐間改亞中

中議大夫

中憲大夫

中順大夫

以上正四品

朝請大夫

朝散大夫

朝列大夫

以上從四品

奉政大夫

奉議大夫

以上正五品

奉直大夫

奉訓大夫

以上從五品

承德郎

承直郎

以上正六品

儒林郎

承務郎

以上從六品

文林郎

承事郎

以上正七品

徵仕郎

從事郎

以上從七品

登仕郎

將事郎

以上正八品

登仕佐郎

將事佐郎

以上從八品

右文散官四十二階由一品至五品爲宣授六品至九品爲敕授敕授則中書署牒宣授則以制命之一品至五品者服紫六品至七品者服緋八品至九品者服綠武官以下皆如之其官常對品惟九品無散官則但舉其職而已武官雜職亦如之

武散官三十四階

龍虎衛上將軍

金吾衛上將軍

驃騎衛上將軍

以上正二品

奉國上將軍

輔國上將軍

鎮國上將軍

以上從二品

昭武大將軍

昭勇大將軍

昭毅大將軍

以上正三品

安遠大將軍

定遠大將軍

懷遠大將軍

以上從三品

廣威將軍

宣威將軍

明威將軍

以上正四品

信武將軍

顯武將軍

宣武將軍

以上從四品

武節將軍

武德將軍

以上正五品

武義將軍

武略將軍

以上從五品

承信校尉

昭信校尉

以上正六品

忠武校尉

忠顯校尉

以上從六品

忠勇校尉

忠翊校尉

以上正七品

修武校尉

敦武校尉

以上從七品

保義校尉

進義校尉

以上正八品

保義副尉

進義副尉

以上從八品

右武散官三十四階自龍虎衛上將軍至進義副尉

由正二品至從八品其除授具前

內侍散官十四階

中散大夫

正二品

中引大夫

從二品

中御大夫

正三品

侍中大夫

從三品

中衛大夫

正四品

中涓大夫

從四品

通侍郎

正五品

通御郎

從五品

侍直郎

正六品

內直郎

從六品

司謁郎

正七品

司閤郎

從七品

司奉郎

正八品

司引郎

從八品

右內侍品秩十四階自中散至司引由正一品至從

八品其餘授具前

司天散官十四階

欽象大夫

從三品

明時大夫

頒朔大夫

以上正四品

保章大夫

從四品

司玄大夫

正五品

授時郎

從五品

靈臺郎

正六品

候儀郎

從六品

司正郎

正七品

平秩郎

從七品

正紀郎

挈壺郎

以上正八品

司麻郎

司辰郎

以上從八品

右司天品秩十四階自欽象至司辰由從三品至從八品其餘授具前

太醫散官十五階

保宜大夫

保康大夫

以上從三品

保安大夫

保和大夫

以上正四品

保順大夫

從四品

保冲大夫

正五品

保全郎

從五品

成安郎

正六品

保和郎

從六品

成全郎

正七品

醫正郎

從七品

醫效郎

醫候郎

以上正八品

醫痊郎

醫愈郎

以上從八品

右太醫品秩十五階自保宜至醫愈由從三品至從

八品其除授具前

教坊司散官十五階

雲韶大夫

僊韶大夫以上從三品

長寧大夫

德和大夫以上正四品

協律大夫從四品

嘉成大夫正五品

純和郎從五品

調音郎正六品

司樂郎從六品

協樂郎正七品

和樂郎從七品

司音郎

司律郎以上正八品

和聲郎

和節郎以上從八品

右教坊品秩十五階自雲韶至和節由從三品至從

八品其除授具前

職制

凡百官印敕圖章之制一品衙門用三臺金印二品三品用兩臺銀印其餘大小衙門印雖大小不同皆用銅其印文皆用巴斯瑪帝師所制蒙古字書惟宣命之寶用玉以玉筋篆文其宣敕皆用紙一品至五品曰宣色以白六品至九品曰敕色以赤雖異乎古之誥敕用織綾亦甚簡古而費約諸蒙古色目官不能執筆花押者例以象牙或木刻而印之宰相近侍官至一品者得旨則用玉圖書押字非特賜不敢用以上舊志無之今增見葉子奇草木子此外官吏職制禁令其不襲前代有關國制者四十二事舊史列入刑法志今改入職制以從其實 諸內外百司呈署文字竝須由下而上論定而後行 諸樞密院行省文卷除軍數及邊關

兵機不在考閱餘竝從監察御史考閱之 諸蒙古人居官犯法論罪既定必擇蒙古官斷之行杖亦然 諸四怯薛及諸王駙馬蒙古色目人犯奸盜詐僞從太宗正府治之 諸內外百司五品以上進表章者竝用蒙古字仍以漢字書其副 諸內外百司應出給劄付有額設譯史者竝用蒙古字 諸內外百司有兼設蒙古回回譯史者每遇行移及勘合文字標譯關防仍兼用之 諸內外百司公移尊卑有定制惟執政出典外郡申部公文書姓不書名 諸大小機務必由中書惟樞密院御史臺徽政宣政諸院許自言所職其餘不由中書而輒上聞既上聞而又不由中書徑下所司行之者以違制論所司亦不稟白而輒奉行者從監察御史廉訪司糾之 諸中書機務有泄

其議者量所泄事聞奏論罪 諸省部官名隸宿衛者晝
出治事夜入番直 諸行省長官二員給金虎符典軍惟
雲南行省官皆給符 諸各處行省所轄軍官軍情怠慢
從提調軍民長官斷遣其餘雜犯受宣官以上咨稟受敕
官以下就斷 諸翰林院譯寫制書必呈中書省共議其
稟其文卷非邊遠軍情重事竝從監察御史考閱之 諸
宣政院文卷除修佛事不在照刷外其餘文卷及所隸內
外司存竝照刷之 諸臺官職掌飭官箴稽吏課內秩羣
祀外察行人與聞軍國奏議理達民庶冤辭凡有司刑名
賦役銓選會計調度徵收營繕鞠勘審讞句稽及庶官廉
貪厲禁張弛編民惇獨流移強暴兼并悉糾舉之 諸行
臺官主察行省宣慰司以下諸軍民官吏之作姦犯科者

窮民之流離失業者豪强家之奪民利者按察官之不稱
職任者餘視內臺立法同 諸御史臺所轄各道憲司民
有冤滯赴愬於臺者咸著於籍歲終則會考其各道之殿
最而黜陟之 諸臺憲所察天下官吏賊污欺詐稽遲罪
入刑書者歲會其數上之藏於中書 諸內外臺歲遣監
察御史刷磨各省文卷并察各道廉訪司官吏臧否官弗
稱者呈臺黜罰吏弗稱者就罷之 諸風憲薦舉必考其
取積彈劾必著其罪狀舉劾失當竝坐之 諸殿中侍御
史凡遇廷臣奏事必隨入內在廷有不可與聞之人卽糾
斥之朝會祭祀一切行禮失儀失次及託故不至者糾罰
之文武百官謁假事故三日以外者以曹狀報之凡官府
冊置百官禮任及被差往還報曹狀竝同 諸廉訪分司

官每季孟夏初旬出錄囚仲秋中旬出按治明年孟夏中旬還其憚遠違期託故避事者從監察御史劾之 諸廉訪司分巡各路軍民官吏有過得罪狀明白者六品以下牒總司論罪五品以上申臺奏聞 諸廉訪司官擅封點軍器庫者笞三十七解職別敘 諸官吏受贓事主雖不告而監察御史廉訪司察實者糾之 諸行省官及首領官受賂隨省廉訪司察知者上之臺已下就問 諸行省理問所見問公事廉訪司輒逮問者禁之 諸牧守官受贓按問垂成近臣奏徵入朝者執付原問官 諸職官受贓廉訪司必親臨聽決有必不能親臨者摘蔽品有司老成廉能正官問之 諸被按官吏有冤抑者詣御史臺陳理所言實罪被告所言虛罪告者仍加等其有故摭按問

官吏以事者禁之 諸按問職官贓毋遽施刑惟眾證已明而不款伏者加刑問之軍官則先奪所佩符而問之 諸風憲官吏但犯贓加等斷罪雖不枉法亦除名 諸軍民官鎮撫邊陲三年無嘯聚之盜者民官減一資軍官升散官一階五年無者軍民官各升散官一等 諸勸農官每歲終則上其所治農桑水利之成績於本屬上司本屬上司會所部之成績以上於大司農若部部考其勤惰成否以上於省而殿取之其在官怠其事隳其法者罪之 諸有司事關蒙古軍者與管軍官約會問 諸管軍官奧魯官及鹽運司打捕鷹房軍匠各投下管領諸色人等但犯強竊盜賊偽造寶鈔略賣人口發冢放火犯姦及諸死罪竝從有司歸問其鬪訟婚田良賤錢債財產宗從繼絕

及科差不公自相告言者從本管理問若事關民戶者從有司約會歸問竝從有司追逮三約不至者有司就便歸斷 諸僧道儒士有爭有司勿問止令三家所掌會問

諸哈的太師有爭止令掌教念經回回人會問應有刑名戶婚錢糧詞訟竝從有司問之 諸僧人但犯姦盜詐僞

致傷人命及諸重罪有司歸問其自相爭告從各寺院住持本管頭目歸問若僧俗相爭田土與有司約會約會不至有司就便歸問 諸寺院稅糧除前宋所有常住及世祖所賜田土免納稅糧外以後諸人布施竝己力典買者依例納糧 諸藩王及軍馬經過郡縣委積館勞竝許於應給官物內支遣隨申行省知會或擅移易齊斂者禁之 諸郡縣非遇聖旨令旨諸王駙馬大臣經過官吏竝免

郊迎仍不得餽贐錢物按治官常糾察之 諸職官但犯軍情違誤受敕官各路就斷受宣官從都省行省處分其餘公罪各路並不得輒斷

右職制一門見舊史刑法志然歷代史志刑法惟述其君相矜恤損益沿革之文若夫五刑五服十惡八議七出戶婚鬪盜之律歷代相沿非一代所刦從不入史志何得獨入元史荒矣哉今刪其刑志惟於此門撮十之四附於職官又考元初循用金律頗傷嚴刻及世祖平宋始除繁苛頒新律曰至元新格仁宗時又取其關於風紀者類集成書號曰風憲宏綱英宗時復命宰執儒臣損益焉號曰大元通制其大綱有三一曰詔制二曰條格三曰斷例凡詔制爲條九十有四條格爲條千有百五十斷例爲條七百

十有七大概纂集世祖以來法制事例而已其五刑之目凡七下至五十七謂之笞刑凡六十七至一百七謂之杖刑以世祖有言天饒其一地饒其一朕饒其一也其徒法年數杖數相附麗爲加減鹽徒盜賊既決而復錄之流則南人遷於迤北北人遷於南方死刑則有斬而無絞惡逆之極者乃有陵遲處死之法大抵多用輕典凡郡國疑獄必遣官覆讞而從輕死罪審錄無冤者亦必待報然後加刑而大德間王約復上言國朝之制笞杖十減爲七今之杖一百者宜止九十七不當又加十也此其君臣間崇尚輕典享國百年天下乂安豈偶然哉然其敝也南北異制事類繁瑣吏得挾情舞法而頑宄之徒又數以赦宥獲免至於西僧歲作佛事或恣意縱囚以售其奸宄俾善良飲

憾論者謂元之刑法其得在寬厚其失在緩弛故附論於此云刑志既刪故附諸此葉子奇草木子又謂元世天下死囚審讞已定亦不加刑皆老死於囹圄自後惟秦王柏顏出天下囚始一加刑故七八十年之中老稚不曾睹斬戮及見一死人頭羣相驚駭考之史傳殊不相合蓋傳聞失實之詞

元史卷八十六終